

xxvii Alcuentros pola Defensa de Los Picos d'Europa

En 36 alcuentros anteriores, conservacionistes y ecoloxistes d'Asturies, Cantabria y Lleón aconceyáronse nel territoriu del Parque Nacional (PN) de Los Picos d'Europa (alternando nes tres comunidaes). Un PN que consiguieron agrandar (1995) del vieyu PN de los Montes de Cuadonga (iniciativa de Pedro Pidal, Marqués de Villaviciosa), cola collaboración decisiva de la consejera de Mediu Ambiente asturiana M^a Luisa Carcedo y l'emburrión final d'Humberto da Cruz, cuando foi direutor del ICONA.

Va unos años que nun se facien esos conceyos y, con motivu del centenariu del PN, promovíos pola Asociación Asturiana d'Amigos de la Naturaleza, ANA, axuntáronse otra vegada'l sábadu 27 d'ochobre n'Avilés (nel contestu d'un *Conceyu Mediuambiental Cantábricu*), pa

discutir el Manifiestu qu'asoleyamos equí. Nél, espéyense la problemática y l'esmoecimientu pol caltenimientu del primer espaciu protexíu d'España (1918).

El Manifiestu nun pudo presentase en Cangues d'Onís, como taba programao, nel Centru d'Interpretación del PN, a cuenta de la ivernada que vieno na fin de selmana que se celebraba tamién el centenariu.

Ufiertámoslo nesta revista *Ciencias* como complementu del artículu sobre la flora del Parque Nacional (páxina 40) y col enfotu de colaborar nel caltenimientu d'esta ayalga bioxeolóxica y cultural del Cordal Cantábricu.

Carlos Lastra, Direutor

Conclusiones de los xxvii Alcuentros pola Defensa de Los Picos d'Europa nel Centenariu de la so Declaración como Parque Nacional.

[Avilés / Cangues d'Onís, 27 y 28 d'ochobre de 2018]

Anguaño cúmplense 100 años de la declaración del Parque Nacional (PN) de los Montes de Cuadonga, güei Parque Nacional de Los Picos d'Europa. Sicasí, la deriva na xestión del PN anubre la celebración del centenariu del que foi primer Parque Nacional declaráu n'España, esto ye, el primer espaciu protexíu nel nuesu país polos sos valores naturales y estáu de caltenimientu.

Esta fin de selmana n'Avilés y Cangues d'Onís tuvieron llugar los xxvii **Alcuentros pola defensa de Los Picos d'Europa**, onde participamos persones pertenecientes a coleutivos ecoloxistes de les tres comunidaes implicaes nel PN, Asturias, Cantabria y Castiella y Lleón. Queremos facer la nuesa particular conmemoración nel centenariu de la creación del PN apurriendo la nuesa crítica a la xestión que se vien faciendo, que creemos alloñada del caltenimientu y de los valores ambientales y sociales que d'ella remanecen.

Los Picos d'Europa poles sos carauterístiques xeolóxiques y orográfiques y pol so allugamientu xeográficu constitúin una unidá con una elevada y singular bayura biolóxica. Magar ye cierto que'l caltenimientu de la naturaleza ye l'oxetivu cimero del Parque Nacional, somos conscientes de que, nel casu de Los Picos d'Europa, la participación de 11 términos municipales que sumen más de 15.000 persones, de les que mil viven en 20 pueblos enclavaos nel so interior, faen de l'actividá humana un componente importante del nuesu Parque Nacional. Somos conscientes del retu que supón compatibilizar los oxetivos de caltenimientu de la naturaleza con garantizar el bienestar y prosperidá de les persones que viven nel PN y la so redolada inmediata.

Partiendo de les anteriores premises, y a manera de resume, queremos señalar dalgunos de los problemes más importantes d'esti espaciu protexíu. Y ello nun añu especialmente importante, por esta conmemoración del centenariu de la so creación y porque tán puestas sobre la mesa una nueva propuesta de xestión (sometida a información pública n'avientu de 2017) y la ellaboración del Plan Rector d'Usu y Xestión (PRUG) del PN, nun procesu empecipiáu a lo cabero de 2016.

PARTICIPACIÓN PÚBLICA Y TRESPARENCIA: LA MIDIDA DE LA SALÚ DEMOCRÁTICA DEL PARQUE NACIONAL

La participación de los axentes sociales (económicos, sociales, culturales) que viven nel PN y la so redolada, lo mesmo que d'asociaciones y organizaciones rellacionaes colos fines del Parque, ente les que nos atopamos les asociaciones conservacionistes, somos una parte marxinal nel Patronatu –muérganu de participación pública del PN– y, polo xeneral, na xestión diaria del espaciu protexíu. Denunciamos les dificultaes y falta de sofitu a la de participar, los repitíos incumplimientos nes mesmes normes de funcionamientu y la falta de tresporencia nel funcionamientu del PN (nun s'espublicen les resoluciones alministratives, la información relevante omítese y les respuestes a les solicitúes d'información, cuando se dan, n'ocasiones son triviales ya irrelevantes). Esta falta de tresporencia ye especialmente grave no que cinca a les cuestiones económicques. Los planes previstos (nuevos Estatutos sometíos a información pública n'avientu

de 2017) mermen entá más los porcentaxes de participación social. Ye necesario dar un xiru radical nesta cuestión, que consideramos clave, yá que ye'l venceyu qu'axunta a les alministraciones implicaes, habitantes, axentes sociales y toes aquelles organizaciones con unos fines que tienen rellación col PN. El refuerzu de personal y especialmente el de llabores de vixilancia, ye absolutamente necesariu.

¿ESCONTRA LA DESINTEGRACIÓN DEL PARQUE NACIONAL? SOBRE LA XESTIÓN ADMINISTRATIVA

El PN de Los Picos d'Europa espárdese per tres CCAA (Asturies, Cantabria y Castiella y Lleón). Siendo conscientes de les dificultaes qu'ello supón pa la xestión del espaciu protexíu, ello nun pue servir de xida. Consideramos que la xestión fecha pol Consorciu creáu en 2010, punxo de manifiestu graves faltes nos llabores de coordinación y xestión integrada del PN. Los intereses «locales», los incumplimientos económicos per parte de les CCAA, les rotaciones añales de l'alministración y la falta d'integración del personal (Llistáu de Puestos de Trabayu) son la causa principal d'estes faltes. La propuesta que n'avientu de 2017 fixeron les tres CCAA pa modificar el réxime de xestión actual del PN, agrava entá más la situación, yá que vendría a suponer la creación de fechu de tres Parques Nacionales, caún cola so propia direición, col so propiu personal y los sos propios oxetivos de xestión. Reivindicamos un nuevu modelu de xestión unitaria que contemple, con estabilidá temporal abondo, un únicu Direutor/a- Conservador, con un cuerpu de trabayadores propiu (incluyendo guardería) y una cuenta presupuestaria común.

EL CALTENIMIENTO NEL PARQUE NACIONAL Y LA FALTA DEL PLAN RECTOR D'USU Y XESTIÓN (PRUG)

Más de venti años dempués de la declaración del PN de Los Picos d'Europa, en 1995, qu'enanchaba l'antiguu PN de los Montes de Cuadonga, seguimos ensin tener un PRUG que trate los oxetivos de caltenimientu, faciendo usu de les evaluaciones correspondientes sobre l'estáu de caltenimientu del Parque, de les capacidaes de carga de les distintes actividaes humanes nel PN y les regulaciones y zonificación pertinentes. Tamién nos referimos a aquellos árees que tienen de ser protexíes de toa actividá humana (Reserves Integrales) y aquellos xeres destinaes a la recuperación de procesos naturales güei perdíos o gravemente amenaciaos nel PN.

La falta d'esti PRUG ye la que fai que los criterios d'autorización de les estremaes actividaes nun tean claros y camuden d'un añu a otru. D'esta miente, pistes d'usu ganaderu y forestal peles que va unos años nun s'autorizaba'l tránsitu en vehículos agora sí se dexa, o los cambeos de criterios d'un añu pa otru de pruebes deportives masives (p.ex. La Travesera). Que l'actividá

Los comienzos en 1986:




Imagen cedida por el *Colectivo Montañero por la Defensa de los Picos de Europa*

Y más de 30 años después??

Organización y coordinación de los Encuentros:



XXVII ENCUENTROS POR LA DEFENSA DE PICOS DE EUROPA

27 y 28 de octubre de 2018. Avilés-Cangues d'Onís

Tras un paréntesis de 6 años, los Encuentros por la Defensa de Picos de Europa retoman su camino este año, haciéndolo al abrigo del "Conceyu Medioambiental Cantábrico" que se celebra en Avilés los días 26 y 27 de octubre. El objetivo no es otro que sumar nuestra voz crítica y nuestra particular conmemoración en el centenario de la creación del primer espacio protegido de España: El Parque Nacional de los Picos de Europa, que nació como PN de la Montaña de Covadonga. Un espacio cuya errática gestión se ha encaminado peligrosamente hacia su explotación mercantil en vez de apostar por la conservación y los valores ambientales y sociales que de ella se derivan.

PROGRAMA

Sábado 27 de octubre. Avilés, Hotel 40 Nudos (C/La Fruta,9) sala B. De 16,30h a 20,00h.:

- **Síntesis histórica del P.N. de los Picos de Europa: aciertos y errores, la conservación como encrucijada.** A cargo de Javier Naves.
- Debate y elaboración por consenso del **manifiesto de conmemoración de los 100 años** del espacio protegido.

Domingo 28 de octubre. Cangues d'Onís:

- **A las 10,00h** salida de la estación de autobuses de Uviéu, en autobús*
- **A las 11,30h.** En la sala de reuniones de la Casa Dago (Centro de Recepción de Visitantes del P.N. de los Picos de Europa): Encuentro con los representantes de las asociaciones ecologistas en el Patronato del Parque desde los inicios de esta representación en 1998.
- **A las 13,00h.** Lectura del manifiesto elaborado en la jornada del sábado y rueda de prensa.
- **A las 13,30:** Salida en bus hacia Covadonga para la comida de picnic y paseo por el entorno.
- **A las 16,30h.** Salida del autobús para el retorno a Uviéu.

*Nota sobre el autobús: Apelando a la coherencia ecologista, pensamos que el desplazamiento debemos hacerlo en transporte colectivo, para ello contamos con un autobús al precio de 7€/persona ida y vuelta. Para gestionar este servicio es imprescindible que quienes vayan a participar en el encuentro y excursión al P.N. **se inscriban antes del día 23**, enviando un mail a cualquiera de estas direcciones: gloriagnieto@gmail.com o jnaves10@gmail.com

Con la colaboración del **CONCEYU MEDIOAMBIENTAL CANTÁBRICO**



Participantes nos Alcuentros d'Avilés

cinxética siga siendo güei día una actividá que se dexa dentro del PN ye prueba d'ello. Tien de prohibise definitivamente la caza deportiva y escluir la figura de Reserva Rexonal de Caza del espaciu protexíu.

LA PROBLEMÁTICA DE LOS PICOS D'EUROPA

Los problemes y amenaces qu'acosen al PN acumúlense y crecen añu tres añu. Los problemes de sobrepastoréu en delles zones (Áliva, Vega d'Enol y Liordes, por casu, y polo xeneral en zones forestales y turberes), causaos por una cabaña ganadera que suma 30.000 cabeces y puesto de manifestu por distintos estudios, nun son nin trataos nin iguaos. El PN tien d'incentivar práutiques agroganaderas más ecolóxicas, torgando les agresives (p.ex. roces) y los usos intensivos. Les quemes son, tamién, un grave problema nel PN y tien que s'elaborar un plan de vixilancia y prevención. La medría descontrola-

da de pruebas deportives, en munchos casos de calter profesional (nun podemos dexar de mentar la Vuelta Ciclista a España) alloñen l'usu del PN de los valores que tendríen de ser parte de la so condición. Un Parque Nacional nun ye llugar pa pruebas deportives comerciales y masives. Per esta mesma sienda va un turismu masivu (al rodiu de dos millones de visites al añu) que ta afeutando sobre manera a llugares con un usu bien intensivu (Ruta del Cares, Llagos d'Enol y La Ercina, H. uente Dé,...) y énte ello la única esmolición paez ser favorecer el so desendolcu incontroláu dotándolu de más infraestructures y mayores posibilidaes d'accesu. Refugamos la construcción de nueves infraestructures dentro del PN, incluyendo trenes cremallera, teleféricos y aparcadorios de vehículos (como los que se proyeuten y anuncien en H. uente Dé y Cua-donga) lo mesmo l'apertura y asfaltáu de pistes. Refugamos igualmente la construcción de nue-

vos miradorios y llinies llétriques con fines turísticos (hotel d'Áliva) y que se dexen'l tránsitu per pistes especialmente sensibles que, amás, en dellos casos pretende convertir en carreteres (Pandébano y, especialmente, a La Collada de Remoña). Otres podríen seguir esti camín: la pista a la Vega de las Mantegas (Onís) tien el riesgu de convertirse nuna nueva vía d'accesu a los Llagos. A última hora, conviértese a los visitantes del PN en puros consumidores dentro d'un parque temáticu. La falta d'un plan d'educación ambiental, dirixíu a los visitantes, escolares y población del llugar, ye llamadera por demás. Los datos de participación de persones n'actividaes feches pol PN (rutes guíes, esposiciones, grupos

escolares) son ridículos y tán comparativamente per debaxo de los d'otros espacios naturales de menor rangu del ámbitu cantábricu ya inclusive nacional. Nesta mesma llinia, l'ausencia d'un programa d'investigación propiu pon de manifestu l'escasu interés por conocer y valorar la esceicional bayura de la biodiversidá del PN.

EL LLOBU Y OTRES ESPECIES DEL PN

Queremos facer una mención especial dentro d'esti apartáu a la situación del llobu. El PN de Los Picos d'Europa foi, hasta feches bien de recién, l'únicu PN con llobos n'España. Entendemos les condiciones particulares de delles actividaes ganaderes en Los Picos d'Europa: elevada presencia de ganáu ovino y caprino, pocos esperiencias y dificultaes n'ocasiones pa implementar midíes preventives y de guarda del ganáu y especiales condiciones orográfiques que favorecen los ata-

ques de llobos y desapaición de ganáu. Sicasí, queremos denunciar l'usu retorcíu que se fai de los problemes que pue acarrexar la presencia de la especie nel PN, magnificando la so importancia y manipulando les emociones venceyaes a los daños que provoca na cabaña ganadera. D'igual mou, manifestamos el nuesu refugu a la xestión de la especie realizada nel PN, llendada a cazar exemplares de manera indiscriminada, inclusive n'époques de xestión y cría, y dexando usar procedimientos que nun dexa la llei (batíes con participación de particulares, usu d'esplosivos). La Direición del Parque Nacional tien de garantizar, como marca la llexislación, la proteición de la especie nel Parque per aciu d'un plan integral dotáu económicamente, güei inexistente, y que contemple propuestas de meyora del sistema de pagu de daños, de midíes preventives y de xestión ganadera y de siguimientu ya investigación sobre la especie, ente otros. Refugamos los controles de población de fauna que se faen amás de colos llobos con otros especies de fauna de mou cada vegada más habitual ya inustificada.

Pa rematar esta declaración, reafirmamos el nuesu compromisu col Parque Nacional de Los Picos d'Europa. Los riesgos de que'l PN se convierta nun llugar onde l'únicu apueste seya la explotación mercantil son güei pergrandes. Y cercanos a un puntu de non retornu. Camentamos que nos atopamos nunos momentos críticos. Entá ye posible qu'esti espaciu protexíu pueda ser una ferramienta de caltenimientu y d'exemplu de cómo compatibilizar los oxetivos de proteición de la naturaleza colos mesmos de garantizar y ameyorar les condiciones de vida de los sos habitantes. El compromisu de los grupos conservacionistes y ecoloxistes ye trabayar pa ello.

N'Avilés, a 27 d'ochobre de 2018